

ILUSTRÂTS I RISULTÂTS DAI SGJÂFS TAL CJISTIEL DI BIACIS, PART DAL SISTEME DIFENSÎF DES VALS DAL NADISON TE ETE DI MIEÇ

Plui lûs su la storie dal Friûl

Minguzzi: «O vin cjatât un edifici fors di doi plans di plante cuasi cuadre par 10 metris di lâ: par studiâlu a fonts o sarin impegnâts di sigûr fin ae fin di chest an»

IN DÌ DI VUÈ Biacis e je une piçule frazion di Pulfar tal cûr de Sclavanie. Biacis al è ancje il non dal riu, affluent dal Nadison, che i cor in bande. Cumò il paisut al à pôc plui di 50 abitants, ma in plene Ete di Mieç al jere sede di un cjistiel che al faseve part dal sisteme difensîf di chês valadis, impuartant pont di pasaç par cui che al voleve rivâ a Cividât.

Il cjistiel, citât tes fonts che a son rivadis a noaltris tor la metât dal 1200, ma che al fo costruît za un secul prime, al veve il non todesc di Ahrensperg, vâl a di «cjistiel des acuilis», par vie che a paronâ in chei agns in Friûl a jerin nobii di lidris e di lenghe gjermaniche. Il fuart, piçul par dimensions,



La ultime scuvierde de campagne di sgjâfs.

ma di impuartance strategiche pal fat di jessi dongje dal puint sul Nadison di Ponteà, al veve sore di se il cjistiel di Landri. Tal 1364, dopo di une vuere jenfri il Patriarcje di Aquilee e il Duche d'Austrie vinçude dal prin, al rivâ l'ordin di sdrumâ il fuart e di improibî di fâlu sù di gnûf; no cate chest diviêt, il cjistiel al vignì in part sistemât tal 1411. Il fuart però, za in rovine e bandonât, al patì ancje il teribil taramot dal 1511; cualchi an dopo, juste dacis des ruvinis, e vignì tirade sù une gleseute che si pues viodi ancjemò in di di vuè, cumò intitulade a Sant Jacum e a Sante Ane. Dilunc dai secui il cjistiel di Biacis al ven dismenteât; vie pai agns '20 dal secul stât il teren al passe ae Italcementi, che al dopre i rescj de costruzion par fâ sù altris edificis. Tal 1927 la stesse Italcementi e recupere la tor di vuardie dal fuart, ancjemò in pîts a flanc dai sgjâfs archeologics in

cors.

Cun di fat, il sît, cumò di proprietât di un privât, al è sogjet a une ricercje in grazie di une colaborazion jenfri il Consorzi pe tutele dai Cjistiei storicis dal Friûl-Vignesie Julie e la Universitât dal Friûl, che za tal 2003 e à fat la prime campagne di sgjâfs cui students dal cors di Conservazion dai bens culturâi.

Come che nus à contât sabide ai 24 di Lui a Biacis – in ocasion de presentazion dai risultâts dai sgjâfs e dal proget di restaur e protezion de aree dal cjistiel – la professore di Archeologie medieval dal ateneu furlan, Simonetta Minguzzi, «fin cumò o vin cjatât materiâi dal Cuatricent e dal Cincent, dopo di quant che al fo sdrumât tal 1364: par esempli vistiari, fiubis, ma ancje ceramicis di buine cualitât. Cumò – e zonte Minguzzi – o vin cjatât un edifici fors di doi plans di plante cuasi cuadre par 10 metris di lâ: par studiâlu a fonts o sarin impegnâts di sigûr fin ae fin di chest an. In plui, tancj rescj dal cjistiel si cjatin sot de glesie che e je in bande».

Responsabile dal proget di recupar dal sît e je la architete Stefania Casucci. «No si pues lassâ lûcs come chescj al lôr destin, ce che nus è rivât fintremai al di di vuè nus pues permeti di lei cemût che si viveve secuî indaûr, une sorte di memorie de materie che o vin di tignî di cont. Par chest – e marche – o vin chê di tornâ a fâ sù il fuart secont i spazis e i volums originaris: no si à di creâ sistemis pustiçs che no àn nuie a ce fâ cul proget iniziâl, ma ben tornâ a fâ sù doprant materiâi bogns di resisti tal timp par rinfuartî lis muraduris permetint cussì ancje a cui che nol è espert di capî cemût che il fuart al jere une volte». Soredut te suaze sei dal ambient dulintor sei dal sisteme difensîf dai cjistiei des Valadis dal Nadison: «Il prossim pas al sarà ancje chel di prontâ dai percors di pueste par visitâ i sgjâfs archeologics ca dongje in mût di vè une idee complete di cemût che i fuarts a jerin insuazâts te nature dal puest», e zonte Casucci.

Pal recupar dal fuart di Biacis une part une vore impuartante le sta fasint il Consorzi pe tutele dai Cjistiei storicis de region. Stant a ce che nus à dit il president Sergio Gelmi di Caporiacco, «l'obietif al è chel di dâur une gnove



Adalt: i students de Universitât dal Friûl impegnâts tai sgjâfs a Biacis. Sul fonts si viôt la gleseute di Sant Jacum e Sante Ane.

vite ai tancj cjistiei che a son ancjemò vie pal Friûl, stant daûr ae lôr conservazion e, se al covente, al lôr restaur. In di di vuè o vin uns 250 cjistiei di proprietât publiche e private tal nestri Consorzi, ma a son ancjemò centenârs i fuarts, magari fats diventâ des vilis di lus tal Votcent, che si sa pôc o nuie di lôr. La nestre volontât – al zonte – e je propi chê di fâ cognossi chescj sîts di epoche romane, langobarde e de Ete di Mieç tant che testimoniancîs materiâls dal timp passât par mantignî fuarte la memorie storiche. Se si fassin bogns lavôrs di recupar, la int e presece une vore il nestri sfuarç, parcè che e scuvierç la storie de sô comunitât identificantsi cun jê: al è cussì che si rinfuartis il sens di identitât e di leam cul puest dulâ che si vîf. O ai di di graziis in maniere particolar – al va indevant Gelmi di Caporiacco – ae Universitât dal Friûl e a duçj i students che nus àn judât a sestâ o a cirî lis olmis di tancj cjistiei dal nestri territorî; in plui graziis ancje ae Region che nus permet di lâ indevant cul nestri lavôr midiant i finanziaments che a rivin de leç 10/2000».

ALESSIO POTOCO